

咱 ê 領袖—咱 ê 僕人

「Lín 中間 ài 做大 ê tiòh 做 lín ê 序細。Ài 做頭人 ê 人 tiòh 做 lín ê 奴僕。」
 (《全民台語聖經》馬太福音 20：26-27)

好 ê 宗教領袖 ê 素質是啥物？咱大部分 ê 人會講咱 ài 公平 kah 可靠 ê 人、會用好口才來鼓舞咱 ê 信心 ê 人，而且 koh 會遵守上帝誠命 ê 人。咱 ài 咱 ê 領導者會 hō 咱安心，koh 會 hō 咱有幫助 ê 答案。咱往往 ài 一個有遠見 ê 人，會來挑戰咱，而且 koh 會提高咱 ê 期待 kah 抱負 ê 人。

雖然 chiah-ê 素質 lóng 是好 ê, m̄-koh, in 無一個符合基督對屬靈領袖 ê 定義。耶穌講領袖 tiòh 做所有 ê 人 ê 僕人，而且祂有以身作則 teh 教導。Tī 最後 ê 晚餐，祂 kā 家己 kah 萬權能 ê 上帝畫等號了後，祂 thng 去祂 ê 外衫，tī 腰裡縛一條巾 á，然後 kā 祂 ê 門徒洗腳。Tī án-ne 做 ê 中間，祂提供一個生動 koh 戲劇性 ê 示範，來表明祂對領袖 ê 定義。

一 koá 當代牧師 ê 自我提昇 hō 我感覺真擔憂。In 往往想 beh tī in ê 會員中 hō 伊家已成做 bē-tàng 挑戰 ê 上司，而且有時會期待(差不多 lóng 有接受 tiòh) in 教會成員 ê phō-tháⁿ。我 mā 質疑教會設施 ê 建設 kah-ná koh khah sêng 大型 ê 鄉村俱樂部；我知影有一間教會 ê 大綜合建築是用三千二百萬美金來起造 ê。Chit 間教會離開 in tī 市中心地區相當 sàⁿ-chhiah ê 厝邊，徙出去郊區。Tī hia, in 有巨大 ê 新中心，內面有 in 自誇 ê 壁球場 (squash court)、網球場 kah 游泳池。In 呼籲講：「你若加入阮 ê 教會，你會 kah 你全款 ê 人做伙；你 ē-tàng 使用所有 chiah-ê 奇妙 ê 設備，而且你有一個牧師會直接向上帝為你 ê 福利祈禱。」

Chit 種自負 ê 自我提昇 kah 基督所講 ê 領導者相抵觸！咱 tiòh 成做 hiah-ê tī 基督內面信任咱 ê 人 ê 謙卑 ê 奴僕。

祈禱：永遠活 ê 萬權能上帝 ah，我承認，對我來講，做一個優越 ê 人比做僕人 kah 奴隸 khah 自然。我是 gōa-á-nih 感激，我 ê 上主 kah 救主耶穌基督願意選擇僕人 ê 方式！求祢幫助我效法祂 ê 模樣，而且歡迎有機會成做至微細 ê，來事奉別人。我 án-ne 懇求是奉耶穌 ê 名。阿們。

(1996.08.25)